

ցութիւնների տեսարանը, ուր հոների առաջնորդը առավել կենդանի էր ստացվել, երեւում էր հակասութիւններով ու տատանումներով, քան թէ վերջնական տեսքում: Ահա հանված մասերից մեկը. «—Որքան մեծ զորքի համար,—հարցրեց Աթլը ողջ պալատական իշխանների գերաւելիս հետաքրքրութիւնը զարթեցնելով:—Ամենափոքրից մինչև ամենամեծ զորքի համար,—պատասխանեց Վարդանը անհանգստացնելով ոչ միայն բուզանդացիներին, այլև իր ուղեկից հայ իշխաններին:—Դու մտածո՞ւմ ես այդ տակով,—դիպավ Աթլը Վարդանին:—Դու գիտե՞ս, ինչու ենք դուրս եկել մեր աշխարհներից և մտնում այլ աշխարհներ: Մենք էլ ոմենք մեզ հալածող թշնամի: Նա ուժեղ է ամենատմեղից: Ավազը, անապատների զովակներ ենք մենք, և ապրել ենք ավազում: Մենք գնում ենք զորքով ու բնտանիքով: Դեռւմ ենք ապրելու, իսկ դու կատակ ես անում, տակով՝ «Մինչև ամենամեծ զորք»: Կարող եմ հինգհարյուր հազարով անցնել ձեր երկիրը մինչև Բուզանդիա:

Բոլորը շունչները պահեցին»¹⁰:

Տպւածքների վրա կատարված են լեզվա-ոճական ուղղումներ ու շտկումներ, որոշ դեպքերում լրացվել են տեքստերը, հետվել ու ընտրվել բառերը: Նախնական տեսքում եղել է «Իշխան, հարցում տամ քեզ և տուր ինձ պատասխան, ո՞վ է մեր տերը»: Վերամշակելիս՝ Դեմիթրիանը լրացրել է այս նախադասութիւնը, վերացրել տեքստի անորոշութիւնը. «այսպէս՝ «—Իշխան հարցում տամ քեզ, տուր ինձ պատասխան: Ձեւ հասկանում, քե՛ս Մամիկոնեից տերը բողել է մեզ... Իայց երբ բողել է մեզ, ո՞վ է մեր տերը»¹¹: Երբեմն էլ նա փոխում է տեքստի այս կամ այն մասը, մտցնում նոր մտմէտներ, մտերմասներ, «Առաջին անգամ նա (Վարդանը) կյանքում կորցրել էր իրեն: Առաջին անգամ նա խաբուում էր իրեն, և ուրիշներին, կեղծում, խարդախում: Նա զգում էր խղճի այնպիսի խայթ, այնքան ամոթանք: Նախնական այս տեքստը նա մշակել է այսպէս. «Առաջին անգամ էլանքում նա տողնաղում է այնպիսի անսովոր մի եղելիւմ ահապարհից: Առաջին անգամ էր տեսնում, որ մարդիկ խաբում են իրենց և ուրիշներին, կեղծում, խարդախում: Նա զգում էր այնքան ամոթանք»¹²:

«Վարդանանքի» ձեռագրերը խոսում վկաներն են այն բանի, թէ ինչպիսի մեծ աշխատանք է կատարել Դ. Դեմիթրիանը՝ հղկելով ու կատարելագործելով իր այդ սքանչելի ստեղծագործութիւնը:

Ա. ԲԱՂԴԱՍԱՐՅԱՆ

ԿԱՐԻՆԻ «ՊԱՇՏՊԱՆ ՀԱՅՐԵՆՅԱՑ» ԿԱԶՄԱԿԵՐՊՈՒԹՅԱՆ ՊԱՏՄՈՒԹՅՈՒՆՆԵՐ

XIX դարի 80-ական թվականների արևմտահայ ազգային-ազատագրական շարժումների պատմութիւն մեզ իր առանձնահատուկ տեղն ունի Կարինի «Պաշտպան հայրենյաց» կազմակերպութիւնը, որը սկզբնաւորեց թուրքական բռնակալութիւն դեմ հայ ժողովրդի վերսկսած պայքարի նոր շրջանը:

«Պաշտպան հայրենյաց» կազմակերպութիւն մասին լուսական հանկամանալից տեղեկութիւններ կան ժամանակի հայ, որոշ շախով նաեւ ռուս և եվրոպական մամուլի էջերում: Ավելի ուշ (1905 թ.), հուլիսի կարգով նրա գործունեութիւնն են անդրադարձել Բ. Մելիք-Գրիգորյանը և Հ. Նշկյանը: Ապա գիտական հոգւածով հանդես եկավ Սարուխանը «Դործ» ամսագրի 1917 թ. 3-ում: Հ. Նշկյանի հուշագրութիւնները, «Առաջին կաշններ» վերնագրով, առանձին գրքուկով հրապարակվեցին 1930 թ.: Առանձին հետաքրքրութիւն են ներկայացնում Մ. Օրմանյանի «Խոհ» և խոսք» աշխատութիւնում եղած ժլատ, լայց արժեքավոր էջերը:

Դիմաւոր հայտմագրութիւն մեզ «Պաշտպան հայրենյաց» կազմակերպութիւն պատմութիւնը համակողմանիորեն անդրադարձել է պրոֆ. Մ. Ներսիսյանը իր «Հայ ժողովրդի ազատագրական պայքարը թուրքական բռնակալութիւն դեմ» աշխատութիւն մեզ, Հեղինակը ինչպես ժամանակի մամուլի, այնպես էլ արխիւային փաստաթղթերի (այդ թվում՝ Տիգրան Կերեքցյանի

¹⁰ Նույն տեղում, էջ 438—439:

¹¹ Նույն տեղում, էջ 25:

¹² Նույն տեղում, էջ 433:

ձեռագիր հուշերի, Թուրքիայի ուսական հյուպատոսների զեկուցագրերի և այլ նյութերի) հիման վրա ըստ արժանվույն վերլուծել և գնահատել է «Պաշտպան հայրենյաց» կազմակերպության գործունեությունը:

Սույն հոդվածում մեր նպատակն է «Պաշտպան հայրենյաց»-ի գործունեությանն անդրադառնալ այն նոր նյութերի քննությամբ, որոնք մեզ հայտնաբերել ենք Երևանի և Մոսկվայի արխիվներում, ինչպես նաև քաղել Սարուխանի վերլուծած հոդվածում և Հ. Նշկյանի ու Մ. Օրմանյանի հուշերում:

Արխիվային նոր փաստաթղթերից առավել արժեքավոր են ՀՍՍՌ կուլտուրայի մինիստրության արվեստի և գրականության թանգարանում պահվող՝ «Պաշտպան հայրենյաց» կազմակերպության մասին Կարինի դատաստանական ատյանի մեղադրական եզրակացության պատճենը, Կարինի թեմի այդ ժամանակվա առաջնորդ Մ. Օրմանյանի՝ այդ դեպքերի մասին Ներսես պատրիարքին գրած նամակները, ինչպես նաև Ռուսաստանի արտաքին քաղաքականության արխիվում (ՌԱՔԱ) պահպանվող և միայն վերջերս մեր կողմից հրապարակված Կարինի ուսական գլխավոր հյուպատոս Ա. Դենների և Վանի ուսական փոխհյուպատոս Կ. Կամսարականի մի քանի զեկուցագրերը:

* * *

«Պաշտպան հայրենյաց»-ը հիմնադրվեց 1881 թ. երիզագործ հաշատուր Կերեքցյանի ջանքերով և իր գործունեության դանդաղ ու խաթարված ընթացքով հարատևեց մինչև 1890-ական թթ. սկզբները¹:

Կազմակերպության ղեկավարությունն իրականացնում էր հինգ հոգուց կազմված գլխավոր խորհուրդը (Գերագույն խորհուրդ), առանց գրավոր կանոնադրության: Կազմակերպության առաջնահերթ խնդիրն էր հայ ժողովրդի ինքնապաշտպանության կազմակերպումը, որի մասին հետագայում վկայում են նրա րանտարկված ու թուրքական դատարանի առջև կանգնած անդամները, իսկ հիմնական նպատակը՝ Հայաստանի անկախության վերականգնումը, որը, հասկանալի պատճառներով, նրանք չեն խոստովանում:

«Պաշտպան հայրենյաց»-ը կառուցված էր տասնապետության կազմակերպական սկզբունքով: Նրա տարրերը ջոկատներում ընդգրկված աշխարհապորայինները նախօրոք ոչ մի առնչություն չպետք է ունենային միմյանց հետ, չպետք է ճանաչեին ընկերության հիմնադիրներին ու ղեկավար գործիչներին: Կազմակերպության անդամներից, առանց բացառության, երդում էին ընդունում և այդ երդմագրերը պահվում էին տասնապետների մոտ: Ապա նրանք ստանում էին կազմակերպության անդամատմանը, որոնք «Պ. Հ.» («Պաշտպան հայրենյաց») դրոշմով թերթիկներ էին: Երդմագրերի վրա նկարված էր խաչաձևված թուր և դաշույն ու գրված էր «ազգային բարենպատակ ձեռնարկ», որը հետամուտ էր հայ ժողովրդին ազատագրել քրդերի, չերքեզների և թուրքական պաշտոնյաների դաժան բռնությունից: Այն վերջանում էր «Ազատություն կամ մահ» նշանաբանով²:

Երդմագրերի օրինակը առաջինը ստորագրած Ալեքսան Էթալիկյանը, որն իր վրա էր վերցրել դեռ կազմակերպական շրջանում գտնվող ընկերությանը սեփական միջոցներից դրամական օժանդակություն ցույց տալու գործը, բերագույն խորհրդի հանձնարարությամբ հետևողականորեն ձեռնամուխ է լինում կազմակերպության մեջ նոր անդամների հավաքագրմանը:

Կարինի դատաստանական ատյանի մեղադրական եզրակացության ակտում կան հետաքրքիր հատվածներ «Պաշտպան հայրենյաց»-ի մեջ ընդունելության կազմակերպման մասին: «Ալեք-

¹ «Պաշտպան հայրենյաց»-ի մինչև 1890-ական թ. սկիզբը գոյություն ունենալու մասին մեր ենթադրության համար հիմք է հանդիսանում կազմակերպության հայտնաբերումից հետո ձերբակալությունից ազատ մնացած նրա ղեկավար անդամների՝ Ա. Վեմյանի, Մ. Նշկյանի և Գ. Զլինկիրյանի ստորագրությամբ Թիֆլիս ուղարկված նամակը, ուր նրանք քննարկելով կազմակերպության անկման պատճառները նոր ծրագիր էին առաջարկում Թիֆլիսի իրենց համախոհներին (տե՛ս «Հայրենիք» շաբաթաթերթը, 1905 թ., 9 դեկտեմբերի, Բոստոն): Այդ մասին է վկայում նաև Հ. Նշկյանն իր «Առաջին կայծերը» գրքում, նշելով, որ 1886 թ. բանտից ազատվելուց հետո ևս Կերեքցյանը և Հ. Իշղալացյանը նորից փորձեցին աշխուժացնել արդեն մարող շարժումը, Եվ վերջապես, 1890 թ. Կարինի հայտնի ցույցի ժամանակ, ըմբոստացողները հիմնականում «Պաշտպան հայրենյաց»-ի նախկին անդամներն էին, որ նորից համախմբվել էին ևս Կերեքցյանի շուրջը:

² Հ. Նշկյան, Առաջին կայծերը, 1930, էջ 122:

սանը (Ալեքսան էթալիկյանը—Ռ. Հ.),—կողմում ենք այնտեղ,—դիմում է ընկերության մեջ ընդունվողներին հետևյալ խոսքերով. «Ես գրանցում եմ ձեզ ընկերության մեջ որպես զինվոր: Հարկ եղած ժամանակ ձեզ կրաժանվի զենք և ամեն օր կստանաք մեկական մեջիդիև³: Մենք կվերականգնենք [մեր] թագավորությունը: Բացի այդ նրա կողմից տարածվում էին հեղափոխական այլ մտքեր: Գալուստին նշանակված էր ամսական երեք լիրա⁴ վարձ, որից 9 լիրան Ալեքսանդրի կողմից իրան տրված էր նախօրոք, համագործակիցներից (ընկերության անգամներից—Ռ. Հ.) նախկին վկայականները հավաքելու և նրանց նոր, համարակալված վկայականներով փոխարինելու համար, որոնցից նա հասցրել էր բաժանել մոտ 80-ը»⁵:

Հողագործ Սարգիս Բարոյանը, Գեղախոռ գյուղից կարենցի դերձակ Շավարշ Հովհաննիսյանի կողմից ընդունվելով կազմակերպության շարքերը, իր հերթին անդամագրել էր Բեղախոռի և հարևան գյուղերի հարյուր գյուղացու: Հովհաննես Ասատուրյանը գրանցել է ձիթողցի վարժապետ Գալուստ Ժամկոչյանի տասնյակի անդամներին, «... որոնց տներից վնասակար հայտարարություններ պարունակող թղթեր երևան ելած են»⁶: Համետագործ-ասպանդակագործ Հակոբ Պետրոսյանը կոշկակար Հակոբ Սերոբյանին ընկերության մեջ ընդունելիս ասել էր. «Ես գրանցում եմ քեզ աշխարհագործում, կտամ քեզ զենք, դու կստանաս օրական մեկ մեջիդիև և կմասնակցես քաղաքից դուրս զինվորական ուսուցումներին»⁷: Իսկ Սիմոն Մինաս Էլպեկյանը Ալեքսան էթալիկյանից ստացած 130 հավաքագրական վկայականները հանձնել է ջրաղացպան Խաչատուր Ավագյանին: Վերջինս հավաքագրել էր հինգ հոգի, այդ թվում Հաջի Հովհաննեսին, որից երդում ընդունելով, բաժանելու համար հանձնել էր անդամագրման 100 վկայական: Հայկական աշխարհագործի մեջ տարբեր ժամանակներում ընդգրկված մի շարք անունների թվարկումից հետո մեղադրական ակտում կարդում ենք. «Թաթուար հայտնել է Ալեքսանին, որ իր կողմից զինվորներ են հավաքագրվում հայկական թագավորության առաջիկա կազմակերպման կապակցությամբ»⁸:

Պետր է մերժել մի ժամանակ ընդունված այն սխալ տեսակետը, թե «Պաշտպան հայրենյաց» կազմակերպության՝ ջոկատների ու վաշտերի բաժանված լինելը իրր ղյուրացրել է նրա անդամների մասսայական ձերբակալումը, որովհետև հարյուրապետները մատնել են տասնապետներին, իսկ տասնապետներն էլ խմբի անդամներին և հակառակը⁹: Ընդհակառակը, տասնապետությունը սկզբունքոր, որի շնորհիվ կազմակերպության անդամներից քչերն էին միմյանց ճանաչել, շատերին հնարավորություն տվեց հետագայում խուսափել ձերբակալությունից: «Ձերբակալվածները 73 հոգի են անդին շանցան, զի տասնապետական դրության հետևությամբ ընկերակիցների ծանոթությունը անձուկ շրջանակի մեջ կր պարփակվեր...»,—իր հուշերում պատմում է այդ դեպքերի լավատեղյակ ականատեսն ու մասնակիցը¹⁰: Ձերբակալությունների ժամանակ Պալաս Տեր-Ղազարյանի մոտ գտնված անդամատոմսը կրել է 4374 համարը¹¹, այդ մեզ իրավունք է տալիս առանց չափազանցության մեջ ընկնելու պնդել, որ կազմակերպության անդամների թիվը անցել է հինգ հազարից:

Երբ կազմակերպությունն ապրում էր դեռ իր գաղափարական ու գործնական աշխատանքների որոնումների շրջանը, և. Կերեքցյանը մեկնում է Վան և հանդիպում ունենում Մկրտիչ

3 Սեկ մեջիդիևն (20 դուրուշ) ռուսական այն ժամանակվա դրամով կազմում էր 1 ո. 60 կոպ.

4 Մեկ լիրան (5 մեջիդիև) հավասար էր ռուսական 8 ռուբլու:

5 ՀՄՄԻ կուլտուրայի միջնատրության գրականության և արվեստի թանգարանի արխիվ, Թ. Ազատյանի ֆ., XII, 11519:

6 Նույն տեղում:

7 Ռուսաստանի արտաքին քաղաքականության արխիվ (հետագայում ՌԱՔԱ), ֆ. քաղ. արխիվ, 1881/1884 թթ., գ. 1625: Տե՛ս նաև ՀՄՄԻ կուլտուրայի միջնատրության գրականության և արվեստի թանգարանի արխիվ, Թ. Ազատյանի ֆ., XII, 11519:

8 ՌԱՔԱ, ֆ. քաղ. արխիվ, 1881/1884 թթ., գ. 1625:

9 Տե՛ս «Մասիս» 1882, № 3367 և «Արձագանք», 1883, № 7:

10 Մ. Օրմանյան, Խոհ և խոսք, Նրուսաղեմ, 1929, էջ 120:

11 Տե՛ս ՌԱՔԱ, ֆ. քաղ. արխիվ, 1881/1884 թթ., գ. 1625, նաև «Մասիս», 1883, № 3463: Մեղադրական ակտի Կարինի առաջնորդարանից Կ. Պոլիս ուղարկված պատճենում՝ № 4274 (տե՛ս ՀՄՄԻ կուլտուրայի միջնատրության գրականության և արվեստի թանգարանի արխիվ, Թ. Ազատյանի ֆ., XII, 11519):

հրիմյանի հետ՝ Վանից *և*։ Կերեքցյանը, հրիմյանի խորհրդով, անցնում է Թիֆլիս, ապա՝ Երևան, Թիֆլիսում հանդիպումներ է ունենում արևելահայ մի շարք գործիչների հետ՝ Ապստամբության հարցը խոր և բազմակողմանի ուսումնասիրելու և կազմակերպության աշխատանքներն ավելի գործնական դարձնելու համար որոշվում է Թիֆլիսի գործիչներից մեկին ուղարկել Կարին։ Այդ նպատակով 1882 թ. հուլիսին Կարին են գալիս Բագրատ Նավասարդյանը և Արսեն Թոխմախյանը։ 1882 թ. ամռանը Նավասարդյանը Կ. Պոլսում հանդիպում է ունենում Ն. Վարժապետյանի հետ, ապա այցելում Կարին, Վան, կազմակերպության գործունեության հետ կապված տարրեր հարցերի շուրջը համաձայնության գալիս Մ. Օրմանյանի ու Մ. հրիմյանի հետ։ Կարինում Նավասարդյանն օգնում է «Պաշտպան հայրենյաց»-ի կազմակերպական ամրապնդմանը։

1881 թ. նոյեմբերի 1-ին առևտրական գործունեության պատրվակով Թիֆլիս մեկնեց կազմակերպության հիմնադիրներից մեկը, Գերագույն խորհրդի անգամ Կարապետ Նշկյանը՝ դրամ հայթայթելու և զենք տեղափոխելու նպատակով։ Առատ խոստումներ ստանալով, մի քանի ամսից նա դարձավ Կարին։ Անցնում էին օրեր, ամիսներ, սակայն խոստացված օգնությունն ուշանում էր։ Եվ ահա Գերագույն խորհրդի նիստերից մեկում *և*։ Կերեքցյանը հանդես է գալիս մի հանդուգն ծրագրով՝ զենք ու զինամթերք ձեռք բերելու համար հարձակվել Կարինի կառավարական զինապահեստի վրա։ Այս առաջարկությունը բուռն վիճարանությունների տեղիք է տալիս և մեծամասնությամբ մերժվում, ուժերի՝ իրենց համար ոչ նպաստավոր փոխհարարակցության պատճառով։ Որոշվում է չհապաղել և Կ. Նշկյանին նորից ուղարկել Թիֆլիս, խոստացված օգնությունն արագացնելու նպատակով։ Թիֆլիսում Նշկյանը մի շարք հանդիպումներ է ունենում տեղի հայ գործիչների, այդ թվում՝ Գր. Արծրունու և Դ. Տեր-Ասատուրյանի հետ։

Թիֆլիսում Նշկյանին առանձին անձինք խորհուրդ են տալիս շուտափույթ կերպով ոչնչացնել բոլոր տեսակի երդմնագրերը, անդամատոմսերն ու մյուս վտանգավոր թղթերը, որոնք կարող են ընկնել թուրքական ոստիկանության ձեռքը և դառնալ կազմակերպության հայտնարբման պատճառ։ Ինչպես իրավացիորեն գրում է Մ. Օրմանյանը, «...ընկերակիցներու արձանագրության տոմսեր բաշխելու ձևը գազանության պահանջին չէր հարմարեր և ձախող հետևանք ալ ունեցավ»¹²։ Ինքը՝ Օրմանյանն սկզբում տեղյակ չէր «Պաշտպան հայրենյաց»-ի գոյությանը, բայց հետո դարձավ նրա ակտիվ մասնակիցը՝ ապահովելով նաև ներսես պատրիարքի աջակցությունը։

«Պաշտպան հայրենյաց»-ի անգամների համար սահմանված էր անդամավճար՝ տարեկան մեկ քառորդ մեջիդիև։ Հավաքված գումարով պետք է զենք գնվեր։ Նախատեսվում էր զենքի հայթայթումը կազմակերպել հայ վաճառականների միջոցով և խիստ ցածր գներով, իսկ հարկ եղած դեպքում նաև ձրի բաժանելու։ Այդ ուղիով զենք ձեռք բերելու գործում կարնեցիք որոշ փորձ ունենի։ Դեռ 1877 թ. սկսած վաճառականներ Է. Եգանյանը և Է. Նշկյանը Կ. Պոլսից զենք էին տեղափոխում Կարին և վաճառում հատկապես հայերին¹³։ Զենք ձեռք բերելու համար կամավոր նվիրատուություններ էին կատարում կազմակերպության քիչ թե շատ ունևոր անդամները։ Ծարրեր նպատակների անվան տակ անց էր կացվում հանգանակություն։

Կազմակերպությունն ուներ նաև զինագործական գաղտնի փոքրիկ արհեստանոց՝ Չայդարայի հեռավոր թաղամասում, Կարինի հայտնի զինագործ Ավետիս Վեմյանի ղեկավարությամբ, որը բանտարկությունների նախօրյակին պատրաստվում էր մեկնել Զեյթուն, որպես կազմակերպության ներկայացուցիչ և մնալ այնտեղ, հավանաբար Զեյթունում կենտրոնացված զինագործարան ստեղծելու նպատակով։

«Պաշտպան հայրենյաց»-ի ղեկավարությունը տեղերում իրագործելու նպատակով որոշվում է Արևմտյան Հայաստանի քաղաքներում ստեղծել հինգական մարդուց կազմված «հեղափոխական խորհուրդներ»։ Այդ որոշումը մասամբ իրագործվում է։ Որոշված էր կենտրոնների համար նշանարանը ամիսը մեկ փոխել։

Շարժման ալիքը իր մեջ էր առել առաջին հերթին Արևմտյան Հայաստանի մեծ քաղաքները, ինչպես նաև Թուրքիայի հայաբնակ շատ այլ վայրեր։ «Ամենուր պատրաստ են զենքի դիմելու, որպեսզի թոթափեն թուրքական լուծը», — գրում էին ժամանակի մամուլի ռուսական ու եվրոպական բազմաթիվ օրգաններ¹⁴։ Կազմակերպությունը պատրաստել և տարածել էր հեղափոխական թուղթիկներ, հուղարկությունների ժամանակ այդպիսի թուղթիկներ գտնվեցին

¹² Մ. Օրմանյան, *Խոհ և խոսք*, Երուսաղեմ, 1929, էջ 119։

¹³ Տե՛ս Է. Նշկյան. *Առաջին կայծերը*, 1930, էջ 27—29։

¹⁴ Տե՛ս, օրինակ, «Московский телеграф», 1883, № 2 և այլ թերթեր։

Թաթոսի մոտ, ինչպես նաև ձերբակալվածներից շատերի տներում: Այլերսան էթալիկյանի և քո-րեպան Կարապետի ընակարաններում հայտնաբերվեցին դրանց տպագրության վիմագրական քարերը: Թուրքիկները մերկացնում ու դատապարտում էին թուրքական բարբարոսական կար-գերը և կոչ անում համախմբվել ու պայքարել նրա տապալման համար:

Կերեքցյանների տանը, որտեղ սկզբում տեղավորված էր «Պաշտպան հայրենյաց»-ի գաղտնի վիմագրատունը, տպագրվում են կազմակերպության 2400 անդամատոմսեր: Փաղարից դուրս, պայուսակով հ. Կերեքցյանը ջորեպան Հարությունին է հանձնում երեք հարյուր անդամատոմս. դրանք ուղարկվում են Վանի հեղափոխական խորհրդին, որի հետ, հավանաբար իր Վանում եղած ժամանակ, հ. Կերեքցյանը հրիմյանի միջոցով համաձայնության էր եկել միավորվելու միասին: Հետագայում այդ կապը շարունակվում էր՝ վերածվելով ավելի սերտ համագործակ-ցության: Ըստ երևույթին, Վանի հեղափոխական խորհուրդը «Պաշտպան հայրենյաց»-ից շառ առաջ Վանում ստեղծված «Սև խաղ» կազմակերպության գործադիր օրգանն էր, որի գործու-նեությունը հեղափոխական որոշակի ընույթ ստացավ հատկապես «Պաշտպան հայրենյաց»-ի հետ կապվելուց հետո: «Պաշտպան հայրենյաց»-ի Գերագույն խորհուրդը մտադիր էր կապեր հաստատել նաև քուրդ ցեղապետների հետ, սակայն այդ ուղղությամբ կազմակերպության ձեռ-նարկած նվազ ջանքերը վերջացան անհաջողությամբ:

1882 թ. նոյեմբերին «Պաշտպան հայրենյաց»-ը պատահականորեն հայտնաբերվեց թուր-քական իշխանությունների կողմից: Նոյեմբերի 25-ին Մելիքսետիկ քահանայի տան առջև բարձ-րացրած աղմուկի ժամանակ վրա հասած ոստիկանները ձերբակալում են «Պաշտպան հայրեն-յաց»-ի մի քանի անդամների և տանում ոստիկանատուն: Խուզարկության ժամանակ Պալաս Տեր-Ղազարյանի և Հարությունի մոտ հայտնաբերվում են ընկերության անդամատոմսեր, հա-վանաբար՝ նաև այլ թղթեր: Խոշտանգումներին երկար չդիմանալով Պալասը հանձնվում է և մատնում նկարիչ Միքայել Մանուկյանին, գուցե նաև իր հարյուրապետ Այերսանդր էթալիկյանին և այն տասնյակի անդամներին, որի հրամանատարն էր ինքը՝ Լսելով, որ կազմակերպությունը հայտնաբերված է, նկարիչ Միքայելը ներկայանում է ոստիկանատուն և խոստանում ամեն ինչ ձշտությամբ ու մանրամասնորեն պատմել, եթե իրեն կրեղունեն ոչ թե որպես շարժման մասնակից, այլ որպես վկա, լրատու («մյուսախր») և կվարձատրեն: Կուսակալը երդումով խոստանում է երկուսն էլ: Միքայելի մասնությունամբ ձերբակալվում են Գերագույն խորհրդի՝ քաղաքում գտնվող անդամները, բացառությամբ Նյ. Տուրաունյանի, ապա և «Պաշտպան հայ-րենյաց»-ի բազմաթիվ շարքային անդամներ, որոնց թիվը սակայն 72-ից չի անցնում՝ շնորհիվ կազմակերպության տասնպետական կառուցվածքի: Չնայած բոլոր խոշտանգումներին, հ. Կերեքցյանն ու նրա ընկերները շմտնեցին Թիֆլիսի իրենց բարեկամներին, որոնցով դատա-քննիչները փութաջանորեն հետաքրքրվում էին:

Կազմակերպության հայտնաբերումից անմիջապես հետո թուրքական իշխանությունները սարսափի մեջ ընկան, և կուսակալի տենդագին հեռագրերն ազդարարեցին այն մասին, որ ողջ Արևմտյան Հայաստանը հեղափոխական շարժման մեջ է և առաջիկայում Ռուսաստանի օժան-դակությամբ ապստամբություն է բարձրացնելու: Ապա օգնության խուճապային աղաղակները արձագանքեցին ամբողջ կայսրության մեջ, և Երզնկայում տեղավորված թուրքական շտրոկը բանակը սրալեց Կարինի վրա: Փաղարի ամրոցների հրանոթները ուղղվեցին դեպի հայկական թաղամասերը: Տեղական զինվորներն ու ոստիկանությունը լրացուցիչ փամփուշտ ստացան և ամենուր պատերազմական ժամանակների պահակություն սահմանվեց: Այնպիսի իրարանցում էր սկսվել, կարծես «սհեղ բանակ մը օսմանյան գահուն հաստատությանը սպառնա»¹⁵: Բայց հետո, երբ պարզվեց, որ այդպիսի իրարանցման հարկ չկա, նրանք հանդարտվեցին. Կ. Պոլսից ստացված հրահանգների համաձայն, ձերբակալություններն ու հարցաքննությունները սկսեցին կատարվել ավելի գաղտնի, իսկ օտարերկրյա դիտորդներին շարժումը ներկայացվեց որպես տե-ղական ընույթ ունեցող աննշան մի դեպք:

Կազմակերպությունը հայտնաբերվելու հաջորդ օրը հաշատուր Կերեքցյանի կրտսեր եղ-բայրը հեղափոխական կոչերով և այլ փաստաթղթերով լի արկղը բեռնակիր Հովհաննեսի մը-ջոցով Պոզոս Թերզիբաշի (Իշղալացյան) տանից տեղափոխում է առաջնորդարանի ծառա Մա-րուբեի ընակարանը և նրա հետ միասին այրում այնտեղ եղած թղթերը՝ գուցե դրանով էլ շատերին փրկելով անխուսափելի պատմից:

¹⁵ ՀՄՄԹ կուլտուրայի միևիտրություն զրականության և արվեստի թանգարանի արխիվ. Թ. Ազատյանի ֆ., XII, 11507:

Բանտում ահավոր խոշտանգումների էին ենթարկում ձերբակալվածներին: Բայց ոչինչ չէր վհատեցնում հայրենասերներին¹⁶:

Այդ օրերին Կարինի հույները մի փոքրիկ գումար են հավաքում և իրենց առաջնորդի միջոցով հանձնում Օրմանյանին՝ ձերբակալվածների ընտանիքներին օգնելու նպատակով: Դա հույն ազգաբնակչության լուր համերաշխության նշանն էր¹⁷:

1883 թ. ապրիլի 6-ին ավարտվեց մեղադրական եզրակացություն հերյուրելու արարողությունը, և պետական մեղադրողը հայտարարեց, որ կազմակերպության անդամները ցանկացել են հեղափոխական ճանապարհով Թուրքիայից անջատել «օսմանյան երկրների մի մասը, այսինքն՝ էրզրումը և շրջակայքը»¹⁸: 1883 թ. ապրիլի 7-ին սկսվում է «Պաշտպան հայրենյաց»-ի անդամների դատավարությունը, որն արևմտահայերի առաջին քաղաքական դատն էր Թուրքիայում: Պետական ամրաստանագրով մեղադրվում են 57 մարդ (56 թուրքահայատակ և մեկ ուսահայատակ): Նկարիչ Միքայել Մանուկյանը, որպես վկա, ազատ է արձակվում, ուստի դատապարտվում են 56 մեղադրյալ: Ապա Կ. Պոլսից, դատապարտյալների բողոքարկների հիման վրա և պատրիարքարանի ջանքերով, գործը վերադարձվում է նոր քննության: Այս անգամ 16-ը ազատվում են, իսկ 40-ը դատապարտվում տարբեր ժամկետների (5—15 տարի) բանտարկության: Որպես ղեկավարներ դատապարտվում են Խաչատուր Կերեքցյանը՝ 15 տարվա, Կարապետ Նշկյանը (հեռակա կարգով)՝ 13 տարվա, Հակոբ Իշղալացյանն ու Հովհաննես Ասատուրյանը՝ 10-ական տարվա և Ալեքսան Էթալիկյանը՝ 7 տարվա բանտարկություն: Չորս գործիչներ դատապարտվում են 6, իսկ 31-ը՝ 5-ական տարվա ազատազրկման:

Դատապարտյալները Կ. Պոլիս են ուղարկում մի բողոքագիր, ուր փորձում էին հերքել իրենց վրա բարդված մեղադրանքը՝ միաժամանակ բողոքելով հարցաքննության ու դատավարության կամայական ընթացքի դեմ և խնդրում էին իրենց արդարացնել: Կ. Պոլսում վճիռը բեկանվեց և ետ ուղարկվեց նոր քննության, բայց 1883 թ. մայիսի 31-ին Կարինի դատարանը, Կ. Պոլսից ստացած ցուցումով, նորից հաստատեց իր նախորդ վճիռը: Ավելի ուշ, Թուրքիայի արդարադատության մինիստրի 1884 թ. հունիսի 6-ի հրամանագրի համաձայն, հունիսի 22-ին (հուլիսի 4-ին) 5 տարվա ազատազրկման դատապարտվածները, որպես երրորդ կարգի հանցագործներ, ազատ արձակվեցին, իսկ 6 տարով դատապարտված չորս մեղադրյալների և 7 տարվա դատապարտված Ալ. Էթալիկյանի (երկրորդ կարգ) պատիժը կրելու ժամկետները երկու երրորդով կրճատվեցին: Առաջին կարգով դատված համարվողների պատժաչափը մնաց նույնը: Մի քանի ամիս անց, 1884 թ. նոյեմբերի 14-ին, ազատվեցին նաև մյուսները, բացի Խ. Կերեքցյանից, Հ. Ասատուրյանից և Հ. Իշղալացյանից, որոնք ազատվեցին 1886 թ. սեպտեմբերին:

«Պաշտպան հայրենյաց» կազմակերպության հայտնաբերումից անմիջապես հետո թուրքական իշխանությունները թխել էին մի հրեշավոր սուտ՝ օտարերկրյա գործակալների դավեր նրշմարելով նրա գործունեության մեջ: Նրանք փութացին ներկայացնել այն որպես հայկական մի խոշոր ապստամբության սկիզբ, որն իրենք արյան մեջ պիտի խեղդեն: Բայց շուտով, վախենալով, որ այդ ցնցող լուրը կրթերն առավել հրահրելով ավելի լուրջ հուզումներ կառաջացնի և միջամտության նոր առիթ կտա «քրիստոնյաների պաշտպան» Նվրոպային, իջեցրին կազմակերպության ու նրա գործունեության նշանակությունը մինչև քրեական ինչ-որ հանցանքների աստիճանի:

Որոշակի պատճառներով «Պաշտպան հայրենյաց» կազմակերպությունը տարբեր ձևերով է ներկայացվել նաև ժամանակի հայ և օտար մամուլի էջերում: Ի. Դռան և տեղերում մահմեդական ամբոխի գրգռմանը տեղիք չտալու մտայնությունը ստիպում էր Կ. Պոլսի հայկական լրագրերին համեմատաբար քիչ և մակերեսորեն անդրադառնալ Կարինի և նրա հետ առնչվող ղեպքերին: Կ. Պոլսում հրատարակվող «Մամուլ» լրագիրը հանդիմանում էր «Մասիս»-ի խմբագրին, որ նա տակավին պաշտոնապես չհաստատված լուրերը «կանուխեն առաջ նետվելով շատ չը խառնակչտեն»՝ իզուր տեղը կապված ու թշնամությունն ավելացնելով: «Օտար թերթերը, — շարունակում է «Մամուլ»-ը, — օտար շահերով ու նկատառումներով կրնան շատ մի բաներ գրել, իսկ հայ թերթի մը բնավ երբեք նկատելի չէ, որ յուր կարծիքները կանխահաս լուրերու վրա հիմնելով խելքին փշածը հրատարակեն»¹⁹: Քիչ անց արդեն «Մասիս»-ն իր հերթին մեղադրում

16 Տե՛ս Մ ա ռ, Թուրքական բանտերը, Ժնև, 1906, էջ 15:

17 ՀՍՍՌ կուլտուրայի մինիստրության գրականության և արվեստի թանգարանի արխիվ. Թ. Ազատյանի ֆ., XII, 11508:

18 Նույն տեղում, XII, 11519, նաև «Մասիս», 1883, № 3463—3464:

19 «Մամուլ», 1882, № 973:

էր «Մշակ»-ին՝ «Պաշտպան հայրենյաց»-ը հակասութեանական քաղաքական կազմակերպություն ներկայացնելու համար²⁰։

Ըթե Բ. Դուրը և նրա թելադրանքով թուրքական թերթերը փորձում էին նվրոպային միջամտելու առիթ չտալու համար թուլացնել տպավորությունը, ապա հենց հանուն այդ միջամտության լոնդոնից 1882 թ. դեկտեմբերի 27-ի (1883 թ. հունվարի 8-ի) հեռագրով նվրոպական բոլոր թերթերը ազդարարում էին. «Այն շարժումը, որ սկսվել է Տաճկական Հայաստանում, շատ ծանրակշիռ նշանակություն ունի և արդեն տարածվել է Կարնո, Վանի, Բիթլիսի և Տիգրանակերտի վիլայեթների վրա»²¹։

Թուրքական կառավարությունը Կարինում ձերբակալություններն սկսելուց երկու շաբաթ էլ շանցած արդեն զգացել էր հարցը չափից դուրս մեծացնելու իր սխալի վտանգավորությունը և փորձում էր դրան ավելի մեղմ կերպարանք տալ։

Իրականում այդ շարժումը համաժողովրդական բնույթ ուներ։ «Պաշտպան հայրենյաց»-ը իր ճյուղավորումներով տարածվել էր ողջ Արևմտյան Հայաստանում և կապեր էր ստեղծել արևելահայության հետ՝ փորձելով հանդես գալ որպես արևմտահայ աշխատավորության սոցիալական ու քաղաքական շահագործման դեմ ուղղված ժողովրդական ընդվզումների համահավաք կենտրոն։

Կազմակերպության լայն հենարանը քաղաքի արհեստավորական դասն էր և շրջակա գյուղացիությունը։ «...Դրեթե բոլորը կա՛մ բուլբուլին կարոտ են, կա՛մ օրը աշխատող և օրը ուտող»,—գրում էր Օրմանյանը, «Պաշտպան հայրենյաց»-ի բանտարկված անդամների մասին²²։ Հիրավի, մեկ-երկու վաճառականի, դերձակի կամ ուսուցչի բացառությամբ, բոլորն էլ հայ աշխատավորներ էին—կոշկակարներ, դարբիններ, անագողներ, կտավագործներ, ասպանդակագործներ, հյուաններ, մաղագործներ, ջրաղացպաններ, մշակներ, ջորեպաններ և մոտիկ գյուղերի հողի աշխատավորներ։ Այս հանդամանքը ցույց է տալիս, որ Արևմտյան Հայաստանի ազատագրմամբ առաջին հերթին շահագրգռված էր երկակի ճնշման տակ գտնվող հայ աշխատավորությունը։

1880-ական թթ. երկրորդ կեսին, բանտից ազատված և Կերեքցյանի ու Հ. Իշղալացյանի ուժերով, «Պաշտպան հայրենյաց»-ը որոշ աշխուժություն ապրեց, որը պսակվեց 1890 թ. Կարինում տարածված կատարված զինված ելույթով։ Ապա նա դանդաղ մարեց, շնչին դիմադրությամբ տեղը զիջելով առավել կազմակերպված ազգային կուսակցություններին։ Կերեքցյանը և նրա գաղափարական կողմնակիցներից շատերը, համաձայն չլինելով նոր սաղմնավորված դաշնակցության տակտիկական գծին, տեղորին ու անժամանակ ընդվզումներին (թեպետ 1890 թ. իրենց էլ էր հրապուրել այդ խայծը), պայքար սկսեցին նրա դեմ, որն ավարտվեց մի ահավոր ողբերգությամբ. դաշնակցության տեղական կոմիտեի որոշմամբ 1891 թ. օգոստոսին և Կերեքցյանը տեղորի ենթարկվեց։

«Պաշտպան հայրենյաց»-ի գործունեությունը Արփ. Արփիարյանը իրավացիորեն գնահատում է որպես Զեյթունի հերոսական ապստամբության նման մի իրադարձություն²³, որը համազգային բնույթ ստանալով, հուշեց հայ ժողովրդին, որ իր ազատությունը նա կարող է ձեռք բերել կազմակերպված, հետևողական ու զինված պայքարով։

«Պաշտպան հայրենյաց» կազմակերպությունն ապրեց միայն իր մանկության շրջանը և դադարեց գոյություն ունենալուց իր ձգտումների կենսագործման համար մղած պայքարի առաջին իսկ քայլերն անելիս։ Բայց նրա գործունեությունը նշանակալից երևույթ էր արևմտահայ ազգային-ազատագրական շարժումների մեջ և կազմում էր 1880-ական թթ. սկսված նրա վերելքի փառապսակը։

Ռ. ՀՈՎՀԱՆՆԻՍՅԱՆ

²⁰ «Մասիս», 1883, N 3497։

²¹ «Մշակ», 1883, N 4։

²² ՀՍՍՌ կուլտուրայի մինիստրության գրականության և արվեստի թանգարանի արխիվ, Թ. Ազատյանի ֆ., XII, 11512։ Տե՛ս նաև ՌԱՔԱ, ֆ. քաղ. արխիվ, 1881/1884 թթ., գ. 1625 թ. 83—85։

²³ «Մշակ», 1883, N 6։